

Parlamentario Tico Croes

E problema di structura estatal no ta un wega di palabra, no ta un problema semantico

ORANJESTAD (AAN) Despues di mas cu un aña di ta miembro di Parlamento sin bisa algo di importancia lagando su votadornan na caya ayera Sr. Rudy Croes posiblemente a kibra e impasse cu ta existi ariba tereno estatal. Prome cu nos bay den e materia cu Sr. Croes a trece padilanti tocante su posicion nobo encuanto di structura estatal, ta bon si pa nos clarifica algun punto, asina Parlamentario Tico Croes a trece dilanti.

Segun Parlamentario Tico Croes ta A.V.P. ta e Partido cu a lanta casi cincuenta aña pasa ariba e deseo di nos Pueblo pa bira un pais ariba nos mes den Reino Hulandes. E prome peticion a bay pa La Reina na 1933. Ta A.V.P. ta e partido cu dia 18 di Maart 1948 (e dia cu despues e.o. a base di esaki a bira dia Nacional) a entrega e mocion di Status Aparte pa Aruba cu a worde acepta unanimamente den Reino Hulandes na Conferencia di Mesa Rondo. Den e mocion aki e concepto di Status Aparte a keda hancra. Ademas e lema "vox populi, vox dei" tambe ta un lema cu a worde introduci den e vocabulario politico aki na Aruba door di A.V.P. (no ta nada cu M.E.P. a preste for di A.V.P., pasobra nos tambe a presente for di antigüedad).

Defundo Betico, ruman di Sr. Rudy Croes a drenta den AVP na aña 1967 y cu honor a bira diputado di AVP sosteniendo e Lucha di nos Partido berde pa varios aña. Despues cu tabata un

pleitamento den partido encuanto liderargo di Partido defunto Betico a lanta su propio Partido MEP. Prome cu un Federacion como opcion estatal, MEP a cambia pa Status Aparte.

Ta despues cu e Hulandesnan a convence MEP cu Status Aparte no ta alcansable MEP a cambia di opinion atrobe (contra deseo di defunto Betico) y a bay opta pa Independencia di Aruba. Door di esaki na aña 1977 AVP a lanta bek ariba e mesun principio cu el a nace esta e Status Aparte pasobra tur partido e tempo ey a laga Status Aparte cai. PPA tabata boga pa un federacion Antiyano y MEP a bay pa Independencia di Aruba, Tico Croes a duna di conoce.

Segun Tico Croes Parlamentario di A.V.P., si Rudy Croes kier ta honesto cu su mes y bay den historia e lo sa cu tambe tabata AVP cu na aña 1982 a yega na un acuerdo den Gobierno Central cu tur partido politico di tur Isla di Antiyas Neerlandes cu nan lo sostene Aruba na Conferencia di Mesa Rondo di 1983 den su deseo pa haña su Status Aparte. MEP e tempo ey tabata den oposicion ariba nivel Central y como Gobierno Insular na conferencia di Mesa Rondo a perde cinco dia tratando di tene e moneda Antiyano pa Aruba en vez di boga pa nos propio florin. Tabata e Gobierno Central den cual AVP a participa y cu Ministro Mito Croes tabata e Ministro di asuntonan estatal cu a logra yega na e acuerdo final di Conferencia di Mesa Rondo

na aña 1983.

Tico Croes a sigui bisa, ta A.V.P. despues di dia 1 di Januari tabatin e honor di introduci cu exito e Status Aparte di Aruba. Y pa caba di refresca memoria di Sr. Rudy Croes ta AVP a sigui cu e lucha pa convence e Hulandesnan cu e Pueblo di Aruba tin e derecho ainda pa dicidi si e kier bira Independiente of mantene e lasonan cu tin awor cu Hulanda. Esaki mientras cu MEP tabata di opinion cu ya caba e Pueblo a dicidi pa bira Independiente y cu Hulanda ta persisti cu Aruba mester bira Independiente na aña 1996. Aña pasa ya MEP den Gobierno a cuminsa prepara e Independencia aki caba.

Sr. Rudy Croes den su discurso den Parlamento a trece padilanti cu Ministro Hirsch den su nota cu a worde prepara pa e discucionnan cu Gobierno ta papia di un "Gemenebest Constitution" y cu e proposicion di Hirsch Ballin por ta acceptable pa Sr. Rudy Croes, Tico Croes a sigui bisa.

Loque Hirsch Balling ta presenta y propone ta pa Aruba keda den Reino Hulandes manera e ta awor y dia e forma aki mantene nacionalidad Hulandes, pasaporte Hulandes. Keda tambe cu e systema hudicial Hulandes, defensa Hulandes y mantene e relacionnan exterior via di Hulanda. Por ultimo Arubianonan ta keda cu tur e derechonan na Hulanda cu e Hulandesnan di Europa tambe tin.

E Independencia cu e grupo Croes den MEP ta papia di dje ta un structura estatal caminda cu nos ta haya e nacionalidad Arubano, pasaporte Arubiano y cu nos mester regla tur e otro asuntonan cu Hulanda via di tratadonan internacional mescos cu e sosode cu Surinam. Pues e diferencia aki ta un diferencia fundamental y no un wega di palabra, pasobra e calidad di cualquier garantia ta depende si nos relacion cu Hulanda lo worde goberna pa derecho estatal of derecho internacional. Tico Croes a trece dilanti.

Segun Tico Croes, AVP ta completamente dispuesto di usa e palabranan Mancomunidad Sui Generis y constitucion di un Mancomunidad basta cu e contenido ta exactamente loque nos tin awe esta e lasonan estatal cu Hulanda cu tur derechonan manera nos a menciona: nacionalidad, pasaporte, defensa, husticia, Hulandes, relacionnan exterior Hulandes y tur e derechonan Hulandes cu awe e Pueblo di Aruba tin.

Si Rudy Croes a compronde kico el a papia kier meen cu e no ta di acuerdo mas cu e rumannan Hendrik y Armando cu a madra un remetido algun dia pasa caminda a excohe claramente pa

loque ala Croes ta papiando pa basta tempo y cu Sr. Rudy Croes a yega di confirma den mas cu un ocasion esta Independencia di Aruba. Asina dia 18 di Januari 1990 na Quito Ecuador Rudy

Croes a declara " Sinembargo Holanda ahora pretende que la cooperacion sobre estos terrenos, no puede ser con base internacional, pero si con base estatal. Para nosotros esto es inacceptable". E confusion a bira

mas grandi pasobra si e conclusion for di e discurso di Sr. Rudy Croes mester ta cu e por bay acepta e proposicion di Hirsch Ballin pa keda den Reino Hulandes ta resulta cu tin un diferencia di opinion dentro di e

ala Croes den MEP. Bentaha di tur esaki sinembargo por ta cu awo e decision pa Sr. Nelson Oduber, cu si kier keda den Reino Hulandes ta bira mas facil pasobra si e tin e sosten di e

votonan di Rudy Croes e por haya e curashi pa actua contra e extremistanan bao di guia di Sr. Hendrik Croes. Probablemente esaki lo solucion e problemnan ariba tereno estatal pasobra si Sr. Nel Oduber y Sr. Rudy Croes bin para banda AVP pa sigura cu Aruba ta keda den Reino Hulandes, esnan cu a resta tras di Sr. Hendrik Croes lo sostene e grupo di Sr. Oduber y pone un fin na e discordia cu ta existi na Aruba ariba tereno estatal. E ora nos por tene e referendum, segund e exigencianan di Nacionnan Uni, mas pronto posibel pa pueblo haya e oportunidad pa dicidi si e kier bira Independiente of keda cu e Status Aparte manera nos conoce awor, parlamentario Tico Croes a conclui.